

Na osnovu člana 13. Zakona o principima lokalne samouprave Federacije Bosne i Hercegovine („Službene novine Federacije BiH“, broj: 49/06 i 51/09) i člana 24. Statuta općine Hadžići („Službene novine Kantona Sarajevo“, broj: 15/ 09, 17/12, 10/13 i 14/13 - ispravka), a u skladu sa članom 8. i 9. Statuta, Općinsko vijeće Hadžići na 8. sjednici održanoj 08.06.2017. godine, d o n o s i

ODLUKU O GRBU I ZASTAVI, USLOVIMA I NAČINU UPOTREBE GRBA I ZASTAVE OPĆINE HADŽIĆI

Član 1.

Ovom Odlukom utvrđuju se izgled, sadržaj, likovno - grafičko rješenje i upotreba grba i zastave Općine Hadžići (u daljem tekstu: Općina).

Izgled grba i zastave Općine Hadžići opisani u članu 1. i 2. Odluke o grbu i zastavi Općine Hadžići, broj: 01/1-023-24/97 od 22.12.1997. godine ostaju nepromijenjeni i kao takvi su preuzeti u ovu Odluku.

Član 2.

Grbom i zastavom Općine predstavlja se Općina i izražava pripadnost Općini.

Član 3.

Grb Općine Hadžići je štitastog oblika. U donjem dijelu grba nalazi se srednjovjekovna kula u Gracu, sive boje; u središnjem dijelu grba nalaze se planine Igman, svijetlozelene boje i Bjelašnica tamnozeleno boje, sa naglašenim bijelim vrhom, u gornjem dijelu grba nalazi se nebo, plave boje, sa mjesecom i zvijezdom, žute boje. Grb je obložen oker trakom sa ivicama crne boje.

Predstavljeni detalji simboliziraju bogato i raznoliko prirodno te kulturno - historijsko naslijeđe Općine.

Član 4.

Zastava Općine Hadžići je dvobojnica pravougaonog oblika, sa tri horizontalna polja, iste širine, poredana odozgo na dolje: zelena, bijela, zelena boja. U sredini zastave, na polju bijele boje, nalazi se grb Općine Hadžići, utvrđen u članu 1. ove Odluke. Grb je svojim vrhovima oslonjen na polja zelene boje. Odnos širine i dužine zastave je 1 : 2. Zastava se može izrađivati u različitim veličinama, s tim što je proporcija uvijek (1:2).

Član 5.

Likovno - grafičko rješenje grba i zastave Općine sastavni je dio ove Odluke.

Likovno - grafički standardi izrade grba i zastave Općine, kao i položaj i veličina grba na zastavi sastavni su dio ove Odluke.

Član 6.

Grb i zastava Općine upotrebljavaju se u skladu sa odredbama ove Odluke, u svrhe i na način kojima se ističe ugled i dostojanstvo Općine.

Grb i zastava Općine mogu se upotrebljavati samo u obliku i sadržini utvrđenim ovom Odlukom.

Član 7.

Grb Općine upotrebljava se:

- na priznanjima koja dodjeljuje Općina Hadžići;
- na zvaničnim pozivnicama, čestitkama i sličnim aktima i predmetima koje u zvaničnoj komunikaciji koriste predsjedavajući Općinskog vijeća i Općinski načelnik;
- prilikom međunarodnih susreta, takmičenja i drugih skupova na kojima učestvuje Općina ili je na njima reprezentovana u skladu sa pravilima i uobičajenom praksom održavanja takvih skupova;
- u drugim prigodnim slučajevima ako njegova upotreba nije u suprotnosti sa odredbama ove Odluke.

Grb Općine može se upotrebljavati:

- na pečatu Općine;
- u službenim prostorijama i natpisima na zgradama gdje su smješteni Općinsko vijeće, Općinski načelnik i Općinske službe;
- na memorandumima i drugim sličnim aktima, kao i službenim vozilima Općine;
- na vijećničkim legitimacijama i drugim službenim legitimacijama koje izdaje Općina;
- u drugim slučajevima u skladu sa zakonom i drugim propisima i aktima Općine.

Član 8.

Zastava Općine ističe se:

- na zgradama gdje su smješteni Općinsko vijeće, Općinski načelnik i Općinske službe;
- na dane praznika na zgradama gdje su smješteni organi i službe Općine;
- u drugim slučajevima pod uslovima i na način određen zakonom.

Zastava Općine može se isticati:

- na zgradama gdje su smješteni organi i službe Općine u vrijeme svečanosti koje se održavaju u Općini i Kantonu Sarajevo;
- prilikom međunarodnih susreta, takmičenja i drugih skupova na kojima učestvuje Općina ili je na njima reprezentovana u skladu sa pravilima i uobičajenom praksom održavanja takvih skupova;
- prilikom proslava, svečanosti i drugih masovnih manifestacija i skupova koje su od značaja za Općinu;
- u drugim prigodnim slučajevima ako njena upotreba nije u suprotnosti sa odredbama ove Odluke.

Član 9.

Upotreba grba i zastave Općine Hadžići slobodna je u umjetničkom stvaralaštvu ili odgojno - nastavnoj svrsi, pod uslovom da se time ne vrijeđa ugled i dostojanstvo Općine.

Grb i zastava Općine mogu se upotrebljavati na kulturnim, sportskim, promotivnim i humanitarnim manifestacijama na kojima se predstavlja Općina (u obliku bedža, zastavice, kape, majice i sl. predmeta).

Odobrenje za upotrebu grba i zastave Općine iz prethodnog stava daje Općinski načelnik.

Član 10.

Grb i zastava Općine ne mogu se upotrijebiti kao robni ili uslužni žig, model ili uzorak, niti kao bilo koji drugi znak za obilježavanje robe ili usluga.

Član 11.

Kada se grb i zastava Općine ističu zajedno sa grbom i zastavom Bosne i Hercegovine, odnosno Federacije Bosne i Hercegovine, odnosno Kantona Sarajevo, isticanje se vrši u skladu sa posebnim propisima Bosne i Hercegovine, odnosno Federacije Bosne i Hercegovine, odnosno Kantona Sarajevo.

Član 12.

Grb i zastava Općine ne mogu se upotrebljavati na javnom mjestu, ako su oštećeni, pohabani ili na drugi način svojim izgledom narušavaju ugled i dostojanstvo Općine.

Oštećeni ili za upotrebu nepodobni grb i zastava povlače se iz upotrebe.

Član 13.

Sastavni dio ove Odluke čine:

Prilog 1 - izgled grba Općine Hadžići i

Prilog 2 - izgled zastave Općine Hadžići.

Član 14.

Stupanjem na snagu ove Odluke prestaje da važi Odluka o grbu i zastavi Općine Hadžići, broj: 01/1-023-24/97 od 22.12.1997. godine.

Član 15.

Ova Odluka stupa na snagu danom objavljivanja na oglasnoj ploči Općine Hadžići, a naknadno će se objaviti u „Službenim novinama Kantona Sarajevo“.

Broj: 01-01-2-4988/2017
Hadžići, 08.06.2017. godine

Predsjedavajući
Općinskog vijeća Hadžići

Senad Kovačević

Prilog 1.

GRAFIČKI IZGLED GRBA OPĆINE HADŽIĆI



Prilog 2.

GRAFIČKI IZGLED ZASTAVE OPĆINE HADŽIĆI

